

地 340.15
41
11~10

武鳴縣志

卷之一



中華民國四年

武鳴縣志

蒙山溫德溥題

序

民國三年甲寅余來武鳴視篆公餘之暇蒐閱邑乘僅存一部而已殘缺不完又搜求邑中前哲之著作有未刊之章劍城增修武緣縣志草何紹庭涸鮒紀畧則又東鱗西爪未堪盡據乃決意重修於是於三月中旬集邑紳開議其時邕南道觀察猶駐是邑同邑范雲梯觀察亦甚贊成而邑紳共襄是舉乃開局於四月一日四閱月而來訪彙輯已畢邑之人僉以孝廉覃珊林可任總編輯乃寄稿至古零土司彈壓署屬任纂修而覃以公冗屬稿錯落閱年

而未能出版余乃走伴以原稿歸續聘古邕曾君穎伯繼續總司纂輯裁定之任曾君於八月來竭一月之力而脫稿於是而武鳴縣志始成余於書成之日詳細披閱視舊志尤爲詳贍豐富而曾君適以序言請余維武鳴之有志舊矣而自清葉道光二十二年滇南余恩詔續修之後七十餘年未有繼者是以任其殘缺民國既建百度聿新則邑乘烏容不載且余之職爲知事也知一縣之事則於志書乎有資言政治則官師教養之宦績風俗之維持學校成立教授之良窳生徒之率教畢業與否所必稽也言興



利則農田水利之墾闢流通所宜悉也言防患則地理之山寨隘堡兵防是否當重爲守衛也言建設則城池官廨倉庫之宜修孔廟之宜規復否也言交通則橋梁道路之宜建宜平治否也言財政則戶口田賦課稅之收入宜核實否也言褒揚則忠孝節烈之姓名宜表彰否也言文藝則邑人之文字論說有新理想之發明否也是皆余所當知者余來武之初鄰封土司之地小醜肆虐蔓及縣境捕而治之數月而定厥後葺城垣修衙署平治策馬大路整頓學校持平獄訟稽核財政不敢自暇自逸以求盡職若

一事或有不知則殊未敢以云知事若是乎縣志烏容不修今以曾君之才識爲余纂輯裁定其有益於是邑之政事何可以道里計顧余思之昔人謂志者史也必紀載詳明搜羅宏富持論正大而後乃蔚爲志之大觀今此書之詳明已非如舊志之缺畧搜羅之宏富亦有可觀則此書之成又不僅止爲一邑之紀載而已然而余尤有說焉邑自劉靈溪太史以德行道義文學提振宗風而百餘年來人才輩出往往多奇人傑士讀黃君鉅示六弟少穎修志之詩則知志不易修而秉筆者當有特識余竊謂今日之

見解當不能以數十年上人物之見爲膠固而後始可以修志何者前人在專制之下今人處共和之世故也是則修志者當準諸政體以爲衡而按時勢以立言斯爲有特識耳志之爲書掌故也記故事爲多記故事則恐或有繩以政體則稍違按諸時勢而未洽者矣是囿於故而不能求新也今政體已更新理日富一邑之志乘未足以賅今日世界之事理夫何待言是在斯人之自爲抉擇其志書之或未發明固非纂輯者之咎也書成爲圖三表四考六紀一畧一錄三傳六其門類有按諸實理不能歸表考紀

錄之統系者或歸統系未洽而改編者則例中自有說蓋以科學眼光視志書無異類書也是說也余甚韙之閱者其深思焉乙卯十月五日蒙山溫德溥撰於武鳴官廨

序

乙卯之秋蒙山溫公潤亭以書來招儒至嶺山囑輯縣志儒不揣譎陋貿然從事於立秋日至縣署繙閱志稿則都人士業已增錄完竣而屬其邑孝廉珊林覃君棉釐定覃以從公古零官書旁午未竟厥功儒乃爲之校閱舊志及今稿竭一月之能力勉強卒事其有應增應削者悉與潤亭商酌盡善而後錄之未嘗自擅竊以爲縣志者記一隅之事也而人事之得失廢興存焉若是乎志之重也審矣夫人莫不有愛其鄉土之思以愛其鄉土之故由是而於

其鄉土之中凡數千百年已往之事無不欲書之一册以爲他日舉動之監觀此志之所由作也武鳴舊名武緣今易武鳴志作於前明正德之十五年至萬曆而續纂至清世道光二十二年而又修輯迄於今而其書四五易綜厥時代三百餘年此中人事廢興得失之數奚能以更僕數耶則今日之纂修縣志固未容緩也然而儒於志之重視與否則有說自科學之發明而東西兩洋之大學術大政治家莫不欲納天下人類蒼萃之區同爲法治之國雖在一州一縣之偏微亦須歸於政治修明之內人類乃得慶

其安寧非謂無法之國而可以競爭生存於世界所謂法者政事是也政事之得失廢興此其中有數存焉者矣以一邑論其爲志也不過紀其政事之得失廢興而已今武鳴縣志之修吾未知其於得失興廢之故有當然否也夫人事之得失廢興亦至無定矣而政事之改良推闡亦至無定今欲以百千年以上之陳迹一朝命令典制之垂遺爲他日之鑒觀竊恐有故步自封之見是則大有碍於進化之公例者也準斯以言則志之爲書亦祇視爲一時之事實而不必以爲固定之章程始可以談一切法也處今

日之世讀今日之書要當廣求新知識新學理乃能與談政治而成爲明達從政之才不得膠執成見徒存崇拜古人之思而又不可以我國家數千年來神聖創造相垂之善法一切吐棄而不用之於人羣以謀幸福斯可以謂之貫徹古今博通中外之政學通儒若是者雖使斯人創議憲法亦可也志書之成其可以拱璧視之耶且即以志言其鴻篇鉅制如龍門之史班氏之書以及杜氏通典漁仲通志端臨通考昔之人莫不以爲中國談政治掌故之書無如其美備矣然其於人羣進化之例政治改良之法及

今日之政學法學又奚嘗先有所發明耶是則今日之志當視爲類書焉可矣有一事則紀一類不必定法古人總總然於體例之辨筆削之嚴但求其事之有密切關係於吾鄉者則筆而記之其事之有光於吾邑者亦備而錄之俾後之人得因是以求新理不至阻新機之發達而作事有益於人羣斯作志者之心卽可以共白於天下吾之爲是言非敢臆爲武斷亦以今日科學相戰之激烈而志書之一字一言或含有守舊之性質恐閱者猶存復古之思是以牖之以新知耳此書之纂輯或有未備望一漏萬誠

恐不免閱志者當擴充其新學識求新學理焉可矣志云乎哉乙卯仲秋古邕曾唯儒穎伯撰於武鳴縣署

叙

縣者國之積也志者史之積也今日之縣志卽異日國史所取材也昔江淹謂史莫難於作志豈以其難而置之哉誠重之也縣自今 耀武上將軍陸公當改革督廣西時改名今縣知事蒙山溫公以志自道光二十二年重修迄今七十餘年矣久未增輯其曷由周知利害屬任纂修竊維縣中爲害者二曰水旱曰盜賊爲利者四曰開墾種植曰預備積儲曰聯絡鄉堡曰防扼要隘而利害兼之者尤在人心風俗嗚呼前事不忘後事之師觀志中地理建置

經政前事諸考可以知所措置矣至若官師選舉諸表政績列傳諸人彰彰可考惟是窮鄉僻壤採訪未及其遺逸待後輯者不少矣是寥寥者豈遂云無憾哉要其於縣中利害則較然矣邇者鄰封告警溫公於武備之餘不忘文事其屬修志固欲周知縣中利害而次第興除非徒廣羅山川旁徵故實已也不揆譎陋勉承其乏兼得協修分纂諸君公慎將事爰參酌前人志例編纂成書開局於甲寅季春脫藁於乙卯仲夏書成就正於 溫公並以告夫欲知縣中利害者乙卯夏縣人覃棉識於古零司署

序

武鳴之有志書由來久矣曷爲而重修乎曰爲一代崛起之偉人開民國紀元之新運曰立德曰立功曰立言可以爲萬世光可以爲歷史光祥麟威鳳間世一生有足供史家之採錄者於是潤鴻猷揚偉烈烏可不重修第沾沾焉以武鳴志書視之淺矣考武鳴舊志昔稱武緣隸思恩府以首善著其間山川之形勝疆域之沿革田賦之改訂戶口之增加至於土習之純民風之樸鄉賢文獻代有達人舊志分編言之詳矣茲勿贅惟由清葉以迄民國七十餘

年邑志未修缺然弗詳歲甲寅蒙山溫公潤亭來宰是邑百政俱舉溫公以戎馬書生平亂之餘蒐及掌故適逢今耀武上將軍陸公榮廷膺受勳位邑志得此有光多矣將軍手創民國迭戡大亂天下重任繫公一身不僅保衛桑梓八百萬生靈也乙卯仲秋爰聘邕甯曾君唯儒重修邑志鴻才卓識縷析條分閱月而書成霖偶遊是邦得觀大畧未嘗不歆然曰一邑之忠孝節義偉烈豐功足以風世而勵俗者能幾人哉不有鴻儒爲之搜羅事實代以付梓千古之後得毋雖美弗彰乎今者顧名思義縣以武

鳴稱固以武功鳴天下斯志重修宗旨本此亦深望後起
英才繼將軍之志述將軍之事代生偉人志不絕書當爲
諸君子所樂從而溫公潤亭重修縣志之苦心侷乎遠矣
霖雖不敏謹弁數言以觀厥後并誌欽仰是邑之立德立
功立言者是爲序

桂林尹沛霖聘三敬序

凡例

一縣志爲全邑之書縣旣更名武鳴則志宜定名爲武鳴縣志

一全書統名爲志係據前志爲增輯所紀諸事有爲前志所未載者悉已添入或據他書或據邑中賢士大夫之著作或全文錄入或叅合或擇要錄入如涸鮒紀畧韋豐華志草之類其爲各書所無者則據采訪所得以編錄焉其采訪文字有未妥洽者悉經改削使歸雅馴

一全書門類前志列爲輿地建置食貨經政學校職官營伍選舉人物藝文十志今以志爲全書總名則各類不得仍同志之公稱修志之始邑紳議仿史遷八書孟堅十志之例列爲表考畧傳等名而所分門類於邑中事實或有未備者或有於民國情勢未合者今悉有所刪削有所增輯一以明世運之移一以見政體之革

一全書卷次先之以輿圖沿革明大勢也次之以地理以土地爲寶也次之以建置凡百事爲因地制宜也

分區爲建設一部分之行政表可第焉次之以典禮
政制有土有民則禮樂爲政事之根原也爲政在人
則官師表見焉所以重教養也有官師始有功業則
勳位筮仕武功之紀錄選舉舊法之存在因以麗焉
由是而藝文宦績前賢忠孝節烈畸行獨善藝術文
字之有關於考察者皆可連類以稽矣

一志書經前哲創作纂修則舊志序文仍當繫之卷首
以不沒前人之善今編者循著作因人因地附見之
例納諸藝文考中則未免自亂藝文止載書目之例

且武鳴賢士大夫之著作已夥是舊序不宜納諸藝
文之中今仍以附諸卷首焉以示不忘前修也

一地理考內昔人有分野之說後以無足憑據遂廁諸
附錄之條不知測景出地自算術旣精悉無差誤則
翼軫所屬詎知無定竊謂自宋明以後學不如古今
日科學發明實效大著不能謂其幽渺無稽今增天
度一門而分野之說附之與氣候之說不附地理以
俟他日專家之參考

一疆域一類舊志所載只錄省志與金鉉通志之說所

載無多今據廣西輿地圖說增載於篇以備參考

一水壩一類原爲地方水利之興廢所關今以修志會之評議全不編錄以省爭端非敢妄爲去取也

一物產一類編者載諸經政考之後殊屬非是蓋物產於地應改歸地理有地乃有物也然鑛產竟未採及殊爲缺畧將來必有明於地理鑛物學者續行采輯當俟後賢

一城池倉庫自治機關各級學校試院書院養濟院壇廟祠宇亭塔橋梁道路街道之類爲邑中建設要政

其有爲從前既立名稱或既有創建修葺或現時修葺完竣者悉令載入或前無此名而今有者如上將臺之類應多增此類以便紀載

一壇廟祠宇之祭祀因時代既易祭禮既不舉行則前日祭文已在當廢之列今擬刪去以省篇幅若他日政府有其舉之則亦必有頒定之典也

一縣中舊分四鄉備記圖里自自治之制頒行乃有劃分區域之舉纂輯志乘者於是以一縣之團廂鄉村方位距城里數列爲一表

如邑人黃誠沅所修隆安縣志

取旁行邪上之

法紀載鄉村之名誠爲一覽了然之善法然因此而存意見者有之是亦法立弊生之必至者然區域亦何常之有且自治奉令停辦則區域當無存在之理由故不繪分圖亦以省事也且表名區域嫌與疆域之名或有溷淆今易其名曰分區表以示與疆域本有差別而第其卷帙於建置考之後俾知爲建設行政之一部分法而已

一孔子自清季升爲大祀民國既建則前代祀典附於學宮者與今日典禮不符今中央定制已有

明令用是合錄祀天關岳合祀增爲典禮考而從前學宮之位次儀節陳設祝版等紀載皆行刪去以尊民國之典章而編學宮於建置考俾知是邑孔子廟之所在地仍猶是尊嚴也

一政體既更法有損益舊制以戶口田賦課稅之收入餉祿役食經費之支出爲經政俾官斯土者有所遵循然今日則戶丁以選舉之調查而有浮報田賦則甫事清釐兵防則清季之末厥制已廢尙何有經常政法之可言今所紀載悉仍其舊而易其名爲政制

考以明他日猶有變更之意

一民國肇建廣西秩序東南半壁實賴今

耀武上將軍陸公維持坐鎮厥功甚偉雖生人無立傳之例而彙編者不察列諸仕宦然則他省之人服官此土又何以例之且公明明受有勳位紀其勳位名義正大識者當不我訾故特創爲勳位紀以表豪傑之眞爲邑乘生色且縣中之服官民國者已不乏人應別爲筮仕錄以備記之其在軍人員與榮軍舊部亦多半有功民國者又應爲武功錄以著是邑武功

之盛而別於前代之軍功焉其後次以各校畢業生者明他日或能以文治武功顯其出身皆由學問不同前此之空疎冀倖矣

一官師選舉二表之人名皆自前清道咸以來繼續纂入若或有遺漏則或爲邑人前此無所紀載或其人名已佚或無片長之足錄此則非編纂之咎矣

一官績畧列傳皆自前清道咸以來所未載者繼續增錄

一忠孝節烈舊志未載者皆悉增入以重綱常以當褒

例

一縣中人士所作詩歌文字美不勝收今亦悉行采入
其或有瑕瑜互見者亦不忍棄亦善善從長之意爾
一脫稿於一月之內爲時甚迫書中或有考據未真之
處且亦邊隅無書之過閱者諒之

乙卯孟秋下澣古邕曾唯儒穎伯撰於武鳴縣署